

Dikté kréyòl 2014

Fanm, ou sé Chatengn...

Noutout savé lè fouyapen payé i ka fin pa pouri é disparèt, mé chatengn ka boujonné, woupousé pou fwitayé ankò parapòt a grenn ki voltijé toupatou. Ni lésèz ka konparé fanm épi chatengn. Mwen, an sèten ni on fanm ki sé chatengn poubon davwa grenn i simé an bon é mové doukou ké oblijé fè florès toulongalé. Fanm-lasa sé Silvyàn Telchid.

Silvyàn ja gadé tranndouz labadijou kasé pa-asi Kapèstè Bèlo. Sé la on mòso a lonbrik a'y téré. Sé la i halé kannòt a lavi an kalmipla kon adan pichòt. Sé la i ka kontinyé gadé solèy douvanjou pwòpté figi a'y adan lanmè chouboulé é bay masko dèyè montangn antibrinaj.

Adan montraj a lang Fransé, Silvyàn gadévvwè poukisa timoun a sèksyon Kapèstè pa té ka rivé konpwann déserten mésaj. I dékatyé sikti a langaj a-yo. I réyalizé fò pa opozé timoun palé lang natal a-yo. Okontrè, i pé vin on bon zouti pou bokanté épi sé timoun-la é libéré pawòl a-yo. Sé konsa i désidé fè lang kréyòl rantré adan montraj lékòl.

Tout travay-lasa, I fè'y asèlfen koutwòch arèsté bloké bokantaj. Pou Silvyàn, sé osi on manyè pou nou pé sa gadé-nou san lawont an fondòk a kokozyé an-nou. I konswa fondè a pawòl a granmoun-lasa : « palé Fransé pa vlé di lèspri ».

Silvyàn pé ké janmé pati adan péyi a loubliyans. chatengn pé payé mé grenn ké simé é pousé anba hazyé, an gran savann, obò létan, si tèt a mòn, koté lizyè, andidan ravin. Asirésèten! Konvwa lanmen ké rékòlté pou wouplanté...

Alen VÉRIN (on mòso a on awtik maké pou gloriyé Silvyàn Telchid)